

Taarsiissuteqarnissamut akisussaaffeqarnek pillugu inatsisip Kalaallit Nunaanni atulersinneqarnera pillugu peqqussutip nalunaarutiginer

Matumuuna taarsiissuteqarnissamut akisussaaffeqarnek pillugu inatsisip Kalaallit Nunaanni atulersinneqarnera pillugu peqqussut nr. 796, 1. oktober 1993-imeersup, peqqussut nr. 507, 12. juni 1996-imeersumi § 2-p, peqqussut nr. 1148, 26. november 2004-imeersumi § 2-p aamma peqqussut nr. 991, 14. oktober 2011-imeersumi § 3-p malitsigisaanik allannguuteqartoq nalunaarutigineqarpoq.

Kapitali 1

Inuup ajoquserneranut pilersuisumillu annaasaqarnermut taarsiissutit ajunngitsorsiallu

Inuup ajoqusernera

§ 1. Inuup ajoquserneranut taarsiissuteqarnissamut akisussaasoq sulinermi iluanaarutini annaasaqarnermut, ajorunnaarnissamut aningaasartuutitut aamma ajoqusernerup malitsigisaanik annaasanut taarsiissutit kiisalu anniarnermut ajunngitsorsiasat akilissavai.

Imm. 2. Ajoquserneq ataavartumik kinguneqarpat aamma ataavartumik ajoqummut ajunngitsorsiasat kiisalu inuussutissarsiorsinnaanerup annaaneqarneranut ajornerulerneranulluunniit taarsiissutit akilerneqassapput.

Imm. 3. Angerlarsimaffimmi sulinerup nalinga inuussutissarsiornermi isertitanut naligiissinneqassaaq.

§ 1 a. Siunissami ajorunnaarnissaq siuneratarlugu aningaasartuutitut ajoqusernerullu malitsigisaanik siunissami annaasassanut allanut taarsiissutit, tak. § 1, imm. 1, annerpaamik ukiumut aningaasartuutissatut naatsorsuutigisat agguaqatigiissinnerannik quleriaataanik amerlisinnerattut annertutigisunut aningaasanut aalajangerneqassapput. Ataavartumik ingerlaavartut aningaasartuutit pineqarpata § 4, imm. 2 taamaaqataanik atorneqassaaq.

Sulinermi iluanaarutit annaaneri

§ 2. Sulinermi iluanaarutit annaaneqarnerinut taarsiissutit ajoqusertup sulileqqissinnaanerata tungaanut akilerneqassapput. Ajoqusertop ataavartumik inuussutissarsiorsinnaanermik annaasaqartoq naatsorsuutigineqarpat ajoqusertup siunissami inuussutissarsiorsinnaaneramik utaqqiisaasumik imaluunniit inaarutaasumik missiliuisoqarnissaata tungaanut taarsiissuteqartoqassaaq, tak. sulitilluni

ajouserup malitsigisaanut isumannaarineq pillugu inatsisip Kalaallit Nunaannut atulersinnera pillugu peqqussummi §§ 5-8 aamma § 10 kiisalu § 36.

Imm. 2. Taarsiissutini ilanngaatineqassapput napparsimanerup nalaani sulisitsisumiit il.il. akissarsiat, ullormusiat imaluunniit pisortaniit ikorsiissutit, napparsimanerup nalaani ullormusiatut atornerqartut, matumunnga ilanngullugit annertussusileriiikkanik ikorsiissutit, sillimmasiisarfimmiit akiliutit ajoqusernermut piviusumut taarsiissutaasut, kiisalu ajoquserumut akiliutinut assingusut.

Anniarneq

§ 3. Anniarnermut ajunngitsorsiassat ullunut tamanut ajoquserup napparsimaneranut 145 kr.-inik annertussuseqarput. Immikkut pisoqartillugu ajoqusersimasooq napparsimanngikkaluarpalluunniit anniarnermut ajunngitsorsiassaqaartitsisoqarsinnaavoq. Ajunngitsorsiassat 55.000 kr.-it qaangissanngilaat.

Ataavartumik ajoquserneq

§ 4. Ataavartumik ajoqusernermut ajunngitsorsissat aningaasanngorlugit aalajangerneqassapput, ajoqusernerup nakorsaasarnep tungaanit isigalugu suussusia annertussusialu tunngavigalugit, aammalu ajoquserup nammineq inuuniarneranut akornutigiligai eqqarsaatigalugit naatsorsorneqassaaq. Ajunngitsorsiassat ajuuteqalernerup annertussusia 100 pct.-iutillugu 631.000 kr.-iussapput. Ajuuteqalernerup annikinneruppat aningaasat ajuuteqalernerup annertussusianut naapertuutissaapput. Immikkut illuinnartumik pisoqartillugu ataavartumik ajoquteqalernerup ajunngitsorsiat annertunerunngorlugit annertussusilerneqarsinnaapput, annerpaamilli 756.000 kr.-inut. Ajoqusernerup annertussusia 5 pct.-it inorpagu ajunngitsorsiartaartitsisoqassanngilaq.

Imm. 2. Ajoquserup sulitilluni ajoqusernermini 40-nik ukioqalersimappat ajunngitsorsiat pineqartup sulitilluni ajoqusernermini 39-nik ukioqalereerfianiit ukiut tamaasa 1 pct.-imik ikileriarinneqartassapput. Ajoquserup 60-nik ukioqalersimappat taarsiissutissat pineqartup sulitilluni ajoqusernermini 59-nik ukioqalereerfianiit ukiut tamaasa suli 1 pct.-imik ikileriarinneqartassapput. Ajunngitsorsiali 69-ileereernikkut ikiliseqqinneqassanngillat.

Inuussutissarsiorsinnaanerup annaana

§ 5. Inuup ajoqusernera sulinikkut aningaasarsiorsinnaanerata annikillineranik kinguneqarsimappat pineqartoq inuussutissarsiorsinnaanermik annaasaqarnermut taarsiiffigineqarsinnaavoq.

Imm. 2. Inuussutissarsiorsinnaanermik annaasaqarnerup naliliiffigineqarnerani ajoquserup piginnaassusii, ilinniagaqarsimanera, ukiui aammalu inuussutissarsiuutigut ilinniaqqissinnaanermut sungiusarneqarnissamullu periarfissai tunngavigalugit pineqartup sulinikkut aningaasarsiorneqarsaanut periarfissatut piumasaqaataasinnaasut assigisaalluunniit isiginiarneqartassapput.

Imm. 3. Ajoquserup inuussutissarsiorsinnaanermik annaasaqarnera procentinngorlugu naatsorsorneqassaaq (inuussutissarsiorsinnaanermik annaasaqarnerup procentia).

Inuussutissarsiorsinnaanermik annaasaqarneq 15 pct.-imik annikinneruppat taarsiisoqassanngilaq.

§ 6. Taarsiissutissat aningaasanngorlugit aalajangerneqassapput, ajoquserup ukiumut akissarsiaatut annertutigisut, tak. § 7, inuussutissarsiorsinnaanermik annaasaqarnerup procentiani amerlisarlugu, tak. § 5, imm. 3, tamatumalu kingorna quleriaataanik amerlisarlugu.

Imm. 2. Taarsiissutit annerpaamik 6.623.000 kr.-inik annertussuseqarsinnaapput.

§ 7. Ukiumut akissarsiatut naatsorsorneqassapput ajoqusernerup pinerata ullua siornatigut ukiumi inuussutissarsiornikkut ajoquserup akissarsiai tamarmiusut.

Imm. 2. Immikkut ittumik akissarsiatigut atorfinitsinneqarnikkulluunniit pissutsit imaluunniit pissutsit immikkuullarissut allat atuussimappata missiliusoqarneratigut ukiumut akissarsiat aalajangerneqassapput.

Imm. 3. (Atorunnaarpog)

§ 8. Ajoquserumut ajoqusernermi sulii 15-inik ukoqalersimanngitsumut taarsiissutissat aningaasanngorlugit aalajangerneqassapput, 303.500 kr.-inik annertussuseqartut ajoqusernerup annertussusianik amerlisarlugu, tak. § 4, tamatumalu kingorna quleriaataanik amerlisarlugu. Ajoqusernerup annertussusia 5 pct.-it inorpagu taarsiisoqassanngilaq.

§ 9. Ajoqusertoq ajoqusernermini 30-nik ukioqalersimappat taarsiissutissat pineqartup sulitilluni ajoqusernermi 29-nik ukioqalereerfaniit ukiut tamaasa 1 pct.-imik ikileriartinneqartassapput. Ajoqusertoq 55-inik ukioqalersimappat taarsiissutissat pineqartup sulitilluni ajoqusernermi 54-inik ukioqalereerfaniit ukiut tamaasa sulii 2 pct.-imik ikileriartinneqartassapput. Taarsiissutissalli 69-ileereernermi ikiliseqqinneqaqqissanngillat.

Sulitilluni ajoqusersinnaanermut sillimmasiisarfik pillugu Kalaallit Nunaanni Aalajangiisartunut saqqummiussineq

§ 10. Ajoqusernerup annertussusianik aamma inuussutissarsiorsinnaassutsip annaaneqartup procentianik aalajangersaaneq pillugu apeqqut pillugu oqaaseqaammik Sulitilluni ajoqusersinnaanermut sillimmasiisarfik pillugu Kalaallit Nunaanni Aalajangiisartuni ajoqusertoq ajoqusiisorlu aallersinnaapput, tak. sulitilluni ajoqusernerup malitsigisaanut isumannaarineq pillugu inatsisip Kalaallit Nunaannut atulersinnera pillugu peqqussut. Oqaaseqaat sapinngisamik oqaaseqaammik noqqaassutip saqqummiunneqarneraniit ukiup ataatsip iluani kingusinnerpaamillu ukiut marluk qaangiutsinnagit tunniunneqassaaq. Inuussutissarsiornermut pissutsinut tunngasut qulaajarneqarsimanngippata, Sulitilluni ajoqusersinnaanermut sillimmasiisarfik pillugu Kalaallit Nunaanni Aalajangiisartut, pissutsit immikkuullarissut pineqartillugit, utaqqiisaasumik oqaaseqaateqarsinnaapput. Taamaattoqartillugu oqaaseqaammit takuneqarsinnaassaaq taanna utaqqiisaasuusoq.

Imm. 2. Sulitilluni ajoqusersinnaanermut sillimmasiisarfik pillugu Kalaallit Nunaanni Aalajangiisartut oqaaseqaataat pisortat ingerlatsineranni suliaassat suliarineqartarnerat pillugu inatsisartut inatsisaanni § 24 malillugu tunngavilersorneqarsimassaaq.

Imm. 3. Ajoqusertoq ajoqusiisorlu Sulitilluni ajoqusersinnaanermut sillimmasiisarfik pillugu Kalaallit Nunaanni Aalajangiisartut suliaanni pisortat ingerlatsineranni suliaassat suliarineqartarnerat pillugu inatsisartut inatsisaanni kapitali 4 malillugu allagaatini paasitinneqarsinnaatitaanermut pisussaaffeqarput.

Suliarinneqqinneq

§ 11. Ajunngitsorsiassat imaluunniit taarsiissutissat pillugit suliaq naammassineqarsimasoq, suliami pissutsit piviusut suliap naammassineqarnerani pissutsinut tunngavigineqartunut naleqqiullutik annertuumik allanngorsimappat ajoqusersimasup noqqaaneratigut suliareqqinneqarsinnaavoq. Suliarinneqqittoqassanersoq pillugu nalilersuineq taarsiissutissanut ataasiakkaanut tamanut ingerlanneqassaaq, taamaattorli tak. imm. 2 aamma 3.

Imm. 2. Inuussutissarsiorsinnaassutsimik minnerpaamik 15 pct.-imik annaasaqarsimaneq siusinnerusukkut aalajangerneqarsimappat suliap suliareqqinnerani sulinermi iluanaarutitut annaasanut taarsiisoqarsinnaanngilaq.

Imm. 3. Ajorunnaarnissamut aningaasartuutitut aamma annaasanut allanut kiisalu anniarnermut ajunngitsorsiassat pillugit suli allanik taarsiisoqarnissaa taamaallaat siunertaralugu ajunngitsorsiassat imaluunniit taarsiissutissat pillugit suliaq suliareqqinneqarsinnaanngilaq. Imm. 1 malillugu suliaq suliareqqinneqarpat peqqissutsip qanoq ittuunerani naatsorsuutigisimanngisamik annertuumik allanngortoqarsimappat ajorunnaarnissamut aningaasartuutitut aamma annaasanut allanut kiisalu anniarnermut ajunngitsorsiassanik taarsiisoqarsinnaavoq.

Imm. 4. Suliap suliareqqinnerani § 10 taamaaqataanik atorneqassaaq.

Pilersuisumik il.il. annaasaqarneq

§ 12. Allap toquneranut taarsiissuteqarnissamut akisussaasoq, toqusoqarnerani pilersuisumik annaasaqartumut ilisinermi aningaasartuutitut taarsiissutinillu naammaginartunut taarsiissutinik akiliissaaq. Pilersuinermit aamma ilaavoq angerlarsimaffimmi toqusup sulisimanerata nalinga.

Aapparisamut imaluunniit inooqatigisamut taarsiissutit

§ 13. Aapparisamut inooqatigisamulluunniit pilersuisumik annaasaqarnermut taarsiissutit toqusup inuussutissarsiorsinnaassusaanut tamakkiisumik annaasaqarnerani pissarsiarineqarsinnaasutut naatsorsuutigineqartariaqartut taarsiissutit 30 pct.-iinik annertussuseqarput, tak. §§ 5-8. Taarsiissutilli minnerpaamik 708.500 kr.-inik annertussuseqarput, pissutsit immikkuullarissut atuutinnippata.

Imm. 2. Pilersuisoq 30-inik ukioqalersimappat § 9-imi malittarisassat malillugit taarsiissutit appartinneqassapput.

Meeqqanut pilersuisumik annaasaqarnermut taarsiissutit

§ 14. Meeqqanut qimagaasunut pilersuisumik annaasaqarnermut taarsiissutit meeqqap pilersorneranut akiliutit, toqusoq akilersuisussaataasimappat, meeqqat inatsisitigut inissisimanerat pillugu Kalaallit Nunananut inatsit malillugu toqusup ajoqusernerata nalaaniit katinnerinut naapertuuttunut aningaasanut aalajangerneqassapput. Toqusoq kisimiilluni pilersuisuusimappat taarsiissutit 100 pct.-imik qaffanneqassapput.

Ikaarsaarnermi aningaasat

§ 14 a. Aappaasumut inooqataasumulluunniit qimagaasumut 119.000 kr.-inik annertussusilinnik ikaarsaarnermi aningaasanik pissarsissaaq. Toqusoq aapparisaamik inooqatigisamilluunniit qimataqanngippat ikaarsaarnermi aningaasat inummut allamut qimagaasumut tunniunneqarsinnaapput, pissutsit immikkuullarissut pissutissaqartitsippata. Ikaarsaarnermi aningaasanik tunniussisoqarpat pineqarteq aamma ilisinermi aningaasartuutitut taarsiissutissanik piumasaqarsinnaanngilaq.

Aningaasat taarsiissutit ajunngitsorsiallu iluarsiivigineqartarneri

§ 15. § 3, § 4, imm. 1, § 6, imm. 2, § 8, § 13, imm. 1, oqaaseqatigiit appaanni, aamma § 14 a-mi aningaasat taaneqartut januarip aallaqqaataani ukiumut 2,0 pct.-imik iluarsiivigineqartarput, ukiumi pineqartumi aningaasanut ukiumi tulluarsaarnermi procentimik ilaneqartumik, tak. akigititanik iluarsiiissutit procenti pillugu inatsit. Matuma kingorna aningaasat pissarsiarineqartut 500-imik agguarneqarsinnaasunut aningaasanut koruuninut akunnaallisineqassapput, § 3, oqaaseqatigiinni siullerni aningaasanut taaneqartunut taamaattoq 5-imik aningaasanut koruuninut agguarneqarsinnaasunut qaninnermut. Iluarsiiineq pissaaq akunnaallisaaneq sioqqullugu piffissami iluarsiiiffiusumi aningaasat atuuttut tunngavigalugit.

Imm. 2. Inatsisinik atuutsitsinermit ministeri iluarsiiinerit suut ingerlanneqassanersut ukiut tamaasa nalunaaruteqartassaaq.

Imm. 3. Taarsiissutit ajunngitsorsiallu, taarsiissutit ajunngitsorsiallu § 16, imm. 1 malillugu akileqquneqarneranni piffissami atuussimasut imm. 1 malillugu aningaasat tunngavigalugit aalajangerneqassapput. § 7 malillugu ukiumut akissarsiat aamma § 14 malillugu taarsiissutit ajoqusernerup pinerani aamma taarsiissutit ajunngitsorsiallu § 16, imm. 1 malillugu akileqquneqarneranni piffissap akornanni imm. 1-mi malittarisassat malillugit iluarsiivigineqassapput.

Akiliineq ernialersuinerlu

§ 16. Taarsiissutip annertussusissaanut naliliinissamut pisariaqartut paasissutissanik ajoqusiisup pissarsereernerata qaammat ataatsip kingorna ajunngitsorsiat taarsiissutillu akileqquneqarsinnaapput. Inaarutaasumik naatsorsuinerup pinissaa sioqqullugu paasinarsippat ajoqusiisoq aningaasat piumasarineqartut ilaannik akiliisinnaasoq taakkua oqaaseqatigiinni siullerni malittarisassat malillugit akilerneqarnissaat piumasarineqarsinnaavoq. Aningaasat taamatut akilerneqartut kiisalu aningaasat utaqqiisaasumik inuussutissarsiorsinnaassutsimik annaasaqarnermut taarsiissutitut akilerneqartut kingusinnerusukkut uterteqquneqarsinnaanngillat imaluunniit taarsiissutissani allani ilanngaatigineqarsinnaanatik.

Imm. 2. Aningaasat, imm. 1 malillugu akileqquneqarneranniit ernialersorneqassapput, akigititassatut aalajangersarneqartumut naapertuuttumik 7 pct.-inik ilaneqartumik ukiumut ernialersorneqarlutik. Inatsimmi matuma akigititassatut isigineqarpoq ukiumi pineqartumi januarip aallaqqaataani aamma julip aallaqqaataani Nationalbankip aalajangersagaa pisortat taarsigassarsisitsinermi erniarititaat. Inatsisinik atuutsitsinermit ministerip Danmarks Nationalbanki aamma Erhvervs- og Vækstministeria isumaqatigiinniarfigereerlugit ukiut marlukkaarlugit erniat allanngortissinnaavai, taamaattoorli oqaaseqatigiinni siullerni tapit taaneqartut 7 pct.-init annikinnerusumik aalajangersarneqarsinnaanatik.

Taarsiissuteqarnissamut akisussaasumut akiliitsinissamut piumasaqarsinnaaneq

§ 17. Isumaginninnermi inatsisit naapertorlugit pisartakkat, matumunga ilanngullugit ikiorsiissutit annertussusilerikkat, naartunermut erninermullu atatillugu ullormusiat aamma sulitilluni ajoqusersinnaanermut sillimmasiisarfik pillugu Kalaallit Nunaannut peqqussut naapertorlugu isumaginninnikkut pensionit akiliutillu, ajoqusernup qimagaasumulluunniit pissarsiarineqartussat taarsiissuteqarnissamut akisussaasumut akiliitsinissamut piumasaqarsinnaanermut tunngavigneqarsinnaanngillat. Aamma taamaapput utoqqalinersiutit, naalagaaffimmit, Namminersorlutik Oqartussanit, kommunimit imaluunniit pensioninik aqqissuussineq alla naapertorlugu akilerneqartut, kiisalu sillimmasiinnermit tunniunneqartut sillimmasiinnerup qanoq ittuunera apeqqutaatinnagu, tak. § 22, imm. 2.

Imm. 2. Sulisitsisoq ajoqusernup ullormusianik imaluunniit napparsimanermi akissarsianik akiliisimasooq imaluunniit taakkununga atasunik akiliisimasooq taarsiissuteqarnissamut akisussaasumut akiliitsinissamut piumasaqarsinnaavoq, sulisitsisoq annaasaqarsimappat.

Taarsigassatut ajunngitsorsiassatullu piumasaqaataasunik nuussineq il.il.

§ 18. Inuup ajoquserneranut taarsiinissamut ajunngitsorsiassanillu piumasaqarneq aamma pilersuisumik annaasaqartumut taarsiissutit pillugit piumasaqarneq, piumasaqarneq taassumalu annertussusissaa akuerineqarsimatinnagu imaluunniit eqqartuussivinnit aalajangerneqarsimatinnagu tunniunneqarsinnaanngilaq.

Imm. 2. Imm. 1-imi taaneqartut taarsiinnerit ajunngitsorsiallu, atorineqarsimasutut naatsorsuutigineqanngitsut, aappariikkunnaanermut, averusernup imaluunniit pigisat immikkoortiternerinut atasumik aappariit nikinneranni pigisanut nalilinnut ataatsimoorussanut ilaassanngillat.

Imm. 3. Imm. 1 aamma 2-mi malittarisassat sulinnermi iluanaarutitut annaasanut taarsiissutit pillugit piumasaqaammik atorineqassanngillat.

Kapitali 2

Ajoqusernup sillimmasiinnermit matussuserneqartunut taarsiissuteqarnissamut akisussaaneq

§ 19. Ajoquserneq pigisat sillimmasernerannit imaluunniit ingerlatsinnermi annaasanut sillimmasernermit matussuserneqartut taarsiissuteqarnissamut akisussaaffeqassanngilaq.

Imm. 2. Imm. 1-imi malittarisassaq atuutissanngilaq:

- 1) taarsiissuteqarnissamut akisussaasoq piaarluni imaluunniit ingasattumik mianersuaalliornikkut ajoqusiisimappat, imaluunniit
- 2) ajoquserneq pisortani ingerlatsinikkut imaluunniit inuussutissarsiornikkut ingerlatsinikkut imaluunniit taakkununga naligiissinneqarsinnaasumik ingerlatsinikkut pisimappat.

Imm. 3. Sulisartoq pigisat sillimmasernerannit, ingerlatsinnermi annaasanut sillimmasernermit imaluunniit sulisitsisup akisussaanageranut sillimmasernerikkut matussuserneqartumik ajoqusiisimappat sulisoq taarsiissuteqarnissamut akisussaassanngilaq, ajoquserneq piaarluni imaluunniit ingasattumik mianersuaalliornikkut pisimanngippat.

§ 20. Naalagaaffik, Namminersorlutik Oqartussat, kommuni imaluunniit pisortat suliffiutaat alla, nalinginnaasumik imminut sillimmasersimasoq, sillimmasersimasutut inissisimavoq, tak. § 19.

§ 21. §§ 19 aamma 20 taarsiissuteqarnissamut akisussaasunut atuutinngilaq, ukunani eqqartorneqartooq
1) angallatinut motorinik ingerlasunut akisussaaneq pillugu Kalaallit Nunaanni angallannermut inatsimmi malittarisassat, imaluunniit allatigut qamutitut inatsisitigut akisussaanermut sillimmasernikkut matussuserneqarsimasut,
2) silaannakkut angallannermut inatsit imaluunniit
3) imarsiorneq pillugu inatsit.

§ 22. Ajoqusersinnaanermut sillimmasertermit matussuserneqartumut taarsiissuteqarnissamut akisussaaffeqarpat, ajoquserneqartup taarsiissuteqarnissamut akisussaasumut taarsiissuteqarnermut akiliisimappat sillimmasiisarfik akuliuteqassaaq.
Imm. 2. Inuunermut, ajutoorsinnaanermut napparsimalernermulluunniit sillimmasiinermit allatigulluunniit inuttut sillimmasiinermit sillimmasiinerup qanoq ittuunera apeqqutaatinngu sillimmasiisarfik taarsiissuteqarnissamut akisussaasumut piumasaqaateqarsinnaanngilaq.

Kapitali 3

Aalajangersakkat assigiinngitsut

Sulisartup taarsiissuteqarnissamut akisussaanera

§ 23. Taarsiissutit, sulisartup illersorneqarsinnaanngitsumik iliuuseqarnerata malitsigisaanik sulisitsisup akilersimasai, pisuuneq takutinneqartooq, sulisartup inissisimanera pissutsillu allat eqqarsaatigalugit naammaginaruutinneqarpata tassannga taamaallaat akileqquneqarsinnaapput.

Imm. 2. Imm. 1-imi taaneqartut pissutsit ajoquserneqartullu soqutigisai eqqarsaatigalugit naammaginaruuppata sulisartup ajoqusernumut taarsiissuteqarnissamut akisussaaffia appartinneqarsinnaavoq imaluunniit atorunnaarsinneqarsinnaavoq. Taarsiissutit sulisitsisumit akilerneqartariaqarsimasut, imm. 1 malillugu akisussaaffik sulisitsisumiippat sulisuusup sulisitsisumit akilerneqarnissai piumasarisinnaavai.

Imm. 3. Imm. 1-imi aalajangersagaq sulisartup sulinermini sulisitsisuminut ajoqusersimasaanut sulisitsisup sulisartumut taarsiissuteqarnissamut piumasaqaataanut taamaaqataanik atorneqarpoq.

Malittarisassanik nalinginnaasumik oqilisaaneq

§ 24. Akisussaaneq taarsiissuteqarnissamut akisussaasumut naammaginangitsumik nanertuutaappat, imaluunniit pissutsit immikkuullarissut tamanna naammaginaruuppassuk taarsiissuteqarnissamut akisussaaneq appartinneqarsinnaavoq imaluunniit atorunnaarsinneqarsinnaavoq. Aalajangiinermit ajoqusernerup annertussusia, akisussaaffiup qanoq ittuunera, ajoqusiisumut pissutsit, ajoquserneqartup soqutigisai, sillimmasiinerit pigineqartut kiisalu allatigut pissutsit eqqarsaatigineqassapput.

Imm. 2. Imm. 1-imi allanneqartuni piumasaqaatit taamaaqataanni ajoquser tup ajoqusernermut peqataanera tamakkiisumik ilaannakuusumilluunniit naatsorsuutigineqarsinnaanngillat. Pilersuisumik annaasaqarsimasumut taarsiissutit pillugit piumasaqarnermi toqusup peqataanera pillugu taamaaqataanik atuupput.

Taarsiisuteqarnissamut akisussaasut arlallit

§ 25. Assigiimmik taarsiisuteqarnissamut akisussaasut arlallit akornanni taarsiisuteqarnissamut nanertuutit agguarneri akisussaanerup qanoq ittuunera allatigullu pissutsit eqqarsaatigalugit naammagartutut isigineqartariaqartut naapertorlugit isumagineqassapput.

Imm. 2. Taarsiisuteqarnissamut akisussaasoq ataaseq arlallilluunniit akisussaanermit sillimmasiinermit matussuteqarpata § 19, imm. 1 aamma 2, aamma § 21 atuutissapput. § 19, imm. 2, nr. 1 aamma 2-mi aamma § 21-imi taaneqartuni pissutsini ajoqusiisut akornanni taarsiisuteqarnissamut nanertuutit taakku akornanni agguaanermi akisussaanermit sillimmasiinerit pigineqartut eqqarsaatigineqassapput. § 20 taamaaqataanik atorineqassaaq.

Anniarnermut ajunngitsorsiat

§ 26. Allap kiffaanngissusianik, eqqissisimaneranik, ataqqinarneranik imaluunniit inuttaanik inatsisinut akerliisumik innarliinermit akisussaasoq anniarneq pillugu eqqunngitsuliorfigineqartumut ajunngitsorsianik akiliissaaq.

Imm. 2. Ajunngitsorsiat aalajangersarneranni innarliinerup pinerluttulerineq pillugu Kalaallit Nunaannut inatsimmi kapitali 15-imi imaluunniit 16-imi aalajangersakkanik unioqqutitsinermik kinguneqartumik pinerluttuliornikkut ingerlanneqarnera pingaartinneqarsinnaavoq.

Imm. 3. Anniartoqanngikkaluartoq allamik inatsisinut akerliisumik innarliinermit akisussaasoq taamaattoq eqqunngitsuliorfigineqartumut akiliissaaq, inummut allamut imaluunniit kiffaanngissutsimut immikkut sakkortuumik saassussilluni pinerluttuliornikkut innarliisoqarsimappat.

Imm. 4. § 18, imm. 1 aamma 2, taamaaqataanik imm. 1-3 malillugu ajunngitsorsianut aamma § 26 a malillugu ajunngitsorsianut atorineqassaaq.

Qimagaasunut ajunngitsorsiat

§ 26 a. Piaaraluni mianersuaalliorujussuortoqarneratigulluunniit allap toquneranut pisuusoq qimagaasut toqusumut immikkut ittumik qaniginnittuusunut immikkut ittumik ajunngitsorsiassaannik akileequneqarsinnaavoq.

Imm. 2. Imm. 1 naapertorlugu ajunngitsorsiaqartitsinissamik naliliineri, aammalu ajunngitsorsiat annertussusissaannik aalajangiineri ajoqusiisup iliusaata suunera, taamatullu aamma qimagaasumut qimagaasunulluunniit qanoq naalliutaatigisimanera ajoqusiisimaneraluunniit immikkut ittumik isiginiarneqassapput.

Inatsimmi malittarisassanik saneqqussineq

§ 27. §§ 1-16, § 24, imm. 2, aamma §§ 26 aamma 26 a-mi malittarisassanik saneqqussineq pillugu isumaqatigiissutit, ajoqusernerup pinera sioqqullugu isumaqatigiissutaasut, saneqqussineq taarsiissuteqarfigineqartussaataitaasumut iluaqutaanngippata atuutissanngillat.

Imm. 2. § 17, imm. 1, § 19, imm. 1 aamma 3, § 20, § 22, imm. 2, § 23, § 24, imm. 1 aamma § 25-imi saneqqussineq pillugu isumaqatigiissutit, ajoqusernerup pinera sioqqullugu isumaqatigiissutaasut, saneqqussineq taarsiissuteqarfigineqartussaataitaasumut iluaqutaanngippata atuutissanngillat.

Taamaattorli § 25-imi malittarisassaq ajoqusernertut, pisortanit imaluunniit inuussutissarsiornermi suliffeqarfinnit imaluunniit taakkununnga sanilliunneqarsinnaasunit suliffeqarfinnit ajoqusiinerusunit saneqqunneqarsinnaavoq.

Kapitali 4

Atuutilersitsinermi aalajangersakkat il.il.

§ 28. Peqqussut ulloq 1. november 1993-imi atulersinneqarpoq aamma peqqussutip atulersinnerata kingorna ajoqusernertut taarsiissuteqarnissamut akisussaaffinnut atorneqarluni.

§ 29. (Ilaatinneqanngilaq)¹⁾

§ 30. Najoqqutassat, taarsiissuteqarnissamut akisussaaffik pillugu inatsit malillugu atulersinneqartut Kalaallit Nunaannut atuutissapput.

§ 31. Sillimmasiisup peqqussutip matuma malitsigisaanik inuup ajoquserneranut pilersuisumillu annaasaqarnermut taarsiissutit annertussusaasa allanngorneri taamaallaat tunngavilersuutigalugit sillimmasiinermi akiligassat qaffanneri pissutigalugu sillimmasiinermut isumaqatigiissutini atorunnaarsissinnaanngilaa.

Peqqussut nr. 1148, 26. november 2004-imeersoq (Pinerluttuliornermi eqqugaasut il.il. pillugit inatsisitigut inissisimanerup pitsaanerulersinnera.) (Inuup ajoquserneranut il.il. taarsiissutissat pillugit malittarisassat nutarterneri kiisalu qamutit motorillit il.il. pillugit akisussaanermut sillimmasiineranut akitsuutit appartinneri.) (Toqusoqarnerani qimataasunut ajunngotsorsiat)²⁾ atuutilersitsinermi ikaarsaarnermilu aalajangersakkanik makkuninnga imaqarpoq:

§ 3. Peqqussut ulloq 1. januar 2005-imi atuutilerpoq aamma peqqussutip atuutilernerata kingorna ajoqusernertut taarsiissuteqarnissamut akisussaanermi atorneqarluni. Ulloq 1. januar 2005-imi atuutilersinnerani taarsiissuteqarnermut ajunngitsorsianillu aningaasat § 2, nr. 11 naapertorlugu 1. januar 2005-imiit iluarsivigineqassapput.

§ 4. Sillimmasiisup peqqussutip matuma malitsigisaanik inuup ajoquserneranut pilersuisumillu annaasaqarnermut taarsiissutit annertussusaasa allanngorneri taamaallaat tunngavilersuutigalugit

sillimmasiineri akiligassat qaffanneri pissutigalugit sillimmasiinermit isumaqatigiissutini atorunnaarsissinnaangilaa.

Peqqussut nr. 991, 14. oktober 2011-imeersoq (Atuisutut isumaqatigiissutini aalajangersimasuni il.il. isumaqatigiissutitigut piumasaqaatit naammaginangitsut) (Atuisutut pissutsini akileeqqussutini akitsuutit il.il. qummut killilernerit) (Niuernermi pissutsini aalajangersimasuni il.il. kingusinaartumik akiliinerit akiorneqarneri pillugu EF-imi peqqussutip naammassineqarnera) (Suliani aningaasartuutit, inatsisitigut ilitersorneqarneq akeqanngitsumillu eqqartuussisutigoortitsineq) (Pisassarisat pisoqalisootut pillugit inatsisip nutaat malitsigisaanik allannguinerit, pisinermut inatsimmi pisinerni aalajangersimasuni il.il. naammagittaalliuteqarnissamut piffissaliussat atorunnaarsinneri) (tunngavilersuinissaq pillugu sillimmasiinermit isumaqatigiissuteqarneq pillugu inatsimmi malittarisassat nutaat, paasissutissanik eqqunngitsunik tunniussisoqarnerani malittarisassanik oqilisaaneq, sillimmasiineri akilersuutini akiliineq, akiliigallarneq pillugu ilitersuut aamma ajoqusiisup akiliisinnaajunnaarnerani il.il. toqqaannartumik piumasaqaatit kiisalu pisuussutitigut pisinnaatitaaffit pillugit inatsisini aalajangersimasuni erniat allanngortinneri)³⁾ atuutilersitsineri ikaarsaarnermilu aalajangersakkanik makkuninnga imaqarpoq:

§ 4. Peqqussut ulloq 1. november 2011-imi atuutilerpoq.

Imm. 2-4. (Ilaatinneqanngillat)

Imm. 5. Peqqussummi § 3 piumasaqaatit ernialersornerinut, 1. november 2011-imi kingusinnerusumiluunniit akileqquneqarsinnaasunut atuuppoq.

Inatsisinik atuutsitsinermit ministeriaqarfik, 11. september 2015

SØREN PIND

/ Helga Lund Laursen

¹⁾ Aalajangersagaq inatsisini allani allannguinerit tunngasuuvuq.

²⁾ Allanguinerni pineqarput §§ 1 a aamma 2, imm. 1, §§ 3, 4 aamma 5, imm. 1 aamma 2, §§ 6 aamma 7, imm. 3, §§ 8-11, 13, 14 a aamma 15, imm. 1 aamma 3, § 16 sioqqullugu qulequtaq, §§ 16 aamma 18, imm. 2 aamma 3, aamma §§ 26, 26 a aamma 27, imm. 1.

³⁾ Allanguinermi pineqarpoq § 16, imm. 2.

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut